



Број/Број: 02,03,03,/11-05-379/09
Сарајево/Sarajevo, 15. 9. 2009.

Izveštaj s proslave 10. godišnjice osnivanja Afričke unije, Tripoli, Libija, od 6. do 10. septembra 2009.

Na poziv predsjednika Narodnog komiteta Velike Socijalističke Narodne Libijske Arapske Džamahirije, Ilija Filipović, predsjedavajući Doma naroda Parlamentarne skupštine BiH, učestvovao je na proslavi 10. godišnjice osnivanja Afričke unije, od 6. do 10. septembra 2009., u Tripoliju, glavnom libijskom gradu.

U pauzama ove manifestacije Ilija Filipović imao je nekoliko bilateralnih susreta s libijskim zvaničnicima.

Predsjedavajući Doma naroda Parlamentarne skupštine BiH susreo se s **gosp. Sulejmanom Al Šahumijem, generalnim sekretarom za vanjske poslove Velikog narodnog kongresa** Velike Socijalističke Narodne Libijske Arapske Džamahirije.

Ilija Filipović uputio je čestitike povodom 40. godišnjice revolucije i 10. godišnjice osnivanja Afričke unije. Tokom ovog susreta obje strane potencirale su poboljšanje odnosa između naših zemalja na političkom, privrednom i kulturnom polju.

Tokom susreta Ilije Filipovića i Mousa Kousa, libijskog ministra vanjskih poslova, potvrđene su obostarane namjere za unapređenje odnosa naše dvije zemlje.

U vezi s tim predsjedavajući Doma naroda inicirao je i posebno istakao tri značajna pitanja: ukidanje viza za bh. građane, uspostavljanje direktne avionske linije Tripoli – Sarajevo i ponovno uspostavljanje pomorskog teretnog saobraćaja na relaciji Ploče – Tripoli. Libijski ministar vanjskih poslova podržao je inicijativu Ilije Filipovića i obećao da će njihovo ministarstvo razmotriti prijedloge o ukidanju viznog režima za građane BiH. Što se tiče direktne avionske linije, libijska strana obavezala se da će provjeriti s libijskim avionskim kompanijama mogućnosti uspostavljanja direktne linije. Jedino sporno pitanje je osnivanje Mješovitog komiteta za međudržavnu saradnju, jer Bosna i Hercegovina nije izabrala svoje članove, dok je Libija imenovala svog koordinатора gosp. Muhameda Ali El Huvejdža, ministra privrede, industrije i trgovine.

Nakon sastanka s gosp. Mousom Kousom, predsjedavajućeg Doma naroda primio je gradonačelnik Tripolija. Razgovaralo se o radu i sadašnjim aktivnostima bh. kompanija u Libiji te boravku naših građana u Tripoliju. Posebno je naglašena potreba za što tješnjom saradnjom gradova Tripolija i Sarajeva kao i obnovom ranije uspostavljenog prijateljstva ova dva grada.

Delegacija Bosne i Hercegovine prisustvovala je proslavi 10. godišnjice osnivanja Afričke unije, koju je upriličio šef države gosp. **Moamer El Gadafi.**

Predsjedavajući Doma naroda sastao se s g. Embarekom M. Šhamihom, predsjednikom Parlamenta Libije.

Ilija Filipović zahvalio se na toploj dobrodošlici i čestitao dva značajna jubileja - 40. godišnjicu revolucije i 10. godišnjicu ujedinjenja afričkih zemalja. Obostrano je potvrđeno da su Bosna i Hercegovina i Libija oduvijek imale dobre odnose, a sada je vrijeme za doprinos unapređenju parlamentarne saradnje. Filipović je spomenuo i svoj razgovor s gosp. Mousom Kousom, ministrom vanjskih poslova, te otvaranje pitanja bezviznog režima za bh. građane. Bosna i Hercegovina ima 20-ak firmi koje rade u Libiji. Da bi se olakšao dolazak bh. stručnjaka, radnika i njihovih porodica, ukidanje viznog režima i direktna avionska linija bili bi optimalno rješenje. Za vrijeme bivše Jugoslavije postojala je pomorska linija Ploče – Tripoli kojom su saobraćali teretni brodovi, te bi obnavljanje te linije značajno doprinijelo jačanju privredne saradnje dvije zemlje. U slučaju rješavanja pitanja viza i uspostavljanja direktne avionske linije bila bi intenzivirana i razmjena znanja. Studenti iz Libije mogli bi se doškolovavati na našim univerzitetima.

Filipović je ponovio poziv predsjedavajućem Parlamenta Libije da posjeti Bosnu i Hercegovinu, navodeći kao moguće termine prvu polovinu oktobra ili prvu polovinu novembra 2009. godine. Predsjednik Parlamenta Libije okvirno je prihvatio ovaj prijedlog te se očekuje pisani odgovor.

Osim spomenutih sastanaka, Filipović se susreo i s **prof. dr. Mahdijem M. Imberešom**, direktorom libijske naučne akademije Jamahiri.

Svim sastancima prisustvovali su gosp. Ferhat Šeta, ambasador Bosne i Hercegovine u Tripoliju, i Ajad S. S. Šaviš, libijski otpravnik poslova u Bosni i Hercegovini. Filipović je tokom svih susreta naglasio značaj diplomatskih predstavništava i činjenicu da je preko njih značajno olakšana saradnja ove dvije zemlje.

Posjeta je bila prilika da shvatimo kako je Velika Socijalistička Narodna Libijska Arapska Džamahirija prijateljska zemlja koja nas želi podržati na putu ka euroatlantskim integracijama i što bržem ekonomskom oporavku, te da je spremna unapređivati saradnju i podići je na najviši nivo.

U pratnji Ilije Filipovića bili su Milena Likokur iz Sektora za međunarodne odnose i protokol PSBiH i Majed Maarouf, prevodilac.

Pripremila:

Milena Likokur, Sektor za međunarodne odnose i protokol

Odobrio:

Ilija Filipović, predsjedavajući Doma naroda PSBiH